

vnd so der slagk eyn ende hat, alßdan sollen sie wider vff sonnabendt mit dem fleische veyl habnn vnd daß wie vor gewest halden. Actum donerstag in vigilia Simonis et Judae anno 2c. LXXXV°.

Nach dem Rathsbuch fol. 218<sup>b</sup> im Archiv des K. Bezirksgerichts zu Leipzig.

No. 538. 1485. 10. Nov.

*Vereidung eines Mäklers.*

Vff donerstag in vigilia Martini 2c. LXXXV<sup>to</sup>. hat der rath an Hanß Roten stadt Tiburtium Vnuorserdt zu meckler aufgenommen, vnd hat dorzu seynen gewonlichem eydt gethan, sich an dem dinst trewlich zu halden gegen dem reichen vnd dem armen vnd kein gut, daß do nicht gebackt ist allß sich geburdt, vngebackt hinwegk furen lassenn, vnd kein gut mit dem halben zirkel ader ander vorglagen gut vorgunen weyl ader vorkauffen lassenn, gantz trewlich vnd ane geferde 2c.

Nach dem Rathsbuch fol. 217<sup>b</sup> im Archiv des K. Bezirksgerichts zu Leipzig.

No. 539. Ohne Jahr.

*Die Ordnung der Buchssenschutzzenn vnd Gesellschaft.*

Nachdem vnnnd als sich bisher vnter den buchssen vnnnd armbrostschutzenn diser stadt Leiptzk vnordenung vnd leichtfertigkeit halbenn vil vnwillens geezenks vnd schaden begeben, derhalben denne dieselbe gesellschaft der schutzen gemeynem nutze, auch inn selbst zcu schympff vnd nachteil fast abegenomen, hat der rath derselbigen gesellschaft vnd sunderlich den buchssenschutzen vf ire begere vnd ansynnen dise ordenung gebenn vnd bestetiget, die sie auch angenommen vnd bewilliget. Der rath wil, das die also vnuorrugklich vnd stetiglich von inn sal gehalten werden; ab ymandt disse ordenung vberfaren vnd die nachgeschribenn stuck vnd artikel aus mutwillen mergklich vbertreten wurde, den wil der rath vbir angezeigte bussenn inhalts disser ordenung selbst straffen.

Czum erstenn hat die gesellschaft vnd bruderschaft der buchssenschutzzenn von dem rathe eyn hoßentuch Leydisch ader Amsterdam alle sontage, anzuheben vff der Pauler ablas nach Ostern biß auff den sontag, so man den Michels iarmarekt außlewtt. Man sal auch vme des raths cleynot nicht schissen, es syn denne XII ader XIII schutzzenn der bruderschaft vorhanden, vnd wer das hoßentuch gewynt, der sal alle sontage vorpflicht sein zcu schissen, es entschuldige dann ynn redeliche vrsach mit wissen des meisters, bey pen I silbern groschen. Item des raths cleynot gewynnet nymandt, er sey dann burger vnd auch bruder in der gesellschaft. Es sol aber nymandt, zcu erlangen die bruderschaft, meher dann I fl. vorpflicht sein zcu geben. Item des raths cleynot ader hoßentuch sal mit dreyen schüssen gewonnen werden; were es aber sach, daß keyner den schyrmnen treffen wurde, der vor-